



Tres protagonistis digl cudesch pigl 100avel aniversari da Benedikt Dolf: Carlo Clopath c'â fatg igl layout, Menga Dolf c'â initzgiu igl project a Julian Reich c'â fatg la redacziun digl cudesch.



Cun lur canzuns deditgeadas a las quater stagiuns ân las scularas ad igls sculars da la scola da Donat lantscho igl aranschamaint. Luzius Hassler â sustanieu igl cor ca vean dirigieu da Nadja Ambühl-Fravi.

FOTOS J. CLOPATH



Cun lur prelecziuns ân Trudy Bott-Juon a...



... Rico Peterelli fatg meraviglias par daple.



Sutsilvanas a Sutsilvans, amitgas ad amitgs, ân saragurdo da lur cumponist a musizist. La sala digl hotel Fravi ad Andeer e stada amplanida tocen sen la davosa sutga.



Igl Cor Incantanti ca vean dirigieu da Christian Klucker tgânta regularmeing canzuns da Benedikt Dolf ca furman egna part impurtanta da lur repertori.

Pigl 100avel anniversari da Benedikt Dolf ad Andeer

Vernissascha digl cudesch an ragurdanza digl cumponist a musizist sutsilvan

DA JOHANN CLOPATH

■ La sonda sera passada â gieu liac ad Andeer igl punct final da diferaints aranschamaints c'en vagnieus organisos par saragurdar digl 100avel anniversari ca Benedikt Dolf vess savieu festivari igls 13 d'avust d'uon: La vernissascha digl cudesch an ragurdanza digl cumponist a musizist sutsilvan. Ca Benedikt Dolf vean anc adigna stimo an Val Schons mussa igl grond interess pigl aranschamaint. Gea fetg bôld â la sala digl hotel Fravi s'amplanieu tocen segl davos plaz. Igl bagnvagnieu e vagnieu purschieu da las scularas a digls sculars da la quarta tocen la sisavla classa da la scola da Donat cun canzuns da Benedikt Dolf deditgeadas a las quater stagiuns digl on. Igl cor c'e vagnieu dirigieu da la Nadja Ambühl-Fravi e vagnieu sustanieu digl musizist ad ancunaschider da Benedikt Dolf, Luzius Hassler. Cun lur tgânt a cuagl acumpognamaint agl «clavazegn» – ear da scularas a sculars – â la scola da Donat fatg grond plascher aglis preschaints.

Egna grânda parsunalitad

Igl segi sto la fegnamira da mussar la parsuna a la parsunalitad da Benedikt Dolf

ord diferaints puncts da vesta, â Julian Reich, igl editur a redactor digl cudesch, managieu. Igl texts digls diferaints auturs musseian parquegl ear fassetas da Benedikt Dolf c'ign ancanschi forza betga fetg bagn near anzuma betg. Igl musizist Lucas Meuli ad igl szientzgiu da musica, Stephan Thomas, safatschaintan cuagl cumponist Benedikt Dolf. Lur temas: «Ein Komponist, der zu seiner Sprache gefunden hat» a «Musikalische Intelligenz, gemüthafte Tiefe». Texts fetg parsunals darivan da parsunas c'ancanschan betga me fetg bagn l'ovra, mobagn c'ân ear gieu egna relaziun speziala cuagl cumponist sutsilvan.

Nus savagn liger «Sunar orgla ei sco da far oraziun» dad Arnold Spescha, «Grenzenloses Staunen» da Luzius Hassler, «Er malte die Blumen in Tönen» da Rico Peterelli a «Götti Beni» da Trudy Bott-Juon. La purschida vean completada cun quegl a tschegl da l'istorgia da famiglia digls Dolf, «Von Banadetg Dulf zu Benedetg Dolf» da Peter Michael-Caflich a cun egn text da Benedikt Dolf sez agl qual el saragorda da la relaziun cuagl sieus bab Tumasch Dolf: «... von der Klarheit unserer Bergkristalle». Mess igls texts a las numerusas fotografieas da la famiglia Dolf, fotografieas pigl ple anc betg ancuna-

schaintas, an la dretga furma â igl designer Carlo Clopath da Trin-Mulin.

La sonda sera ad Andeer ân igls preschaints dantant betga stuieiu sacuntantar me cuagls tetels da las contribuziuns. Cun lur schatgs or da lur ragurdanzas ân Trudy Bott-Juon a Rico Peterelli fatg gust a meraviglias par daple.

Egna sera bagnetageada

La vernissascha e ida a fegn cun canzuns da Benedikt Dolf, cantadas digl cor Incantanti sut la direcciun da Christian Klucker. Cun las canzuns ca furman egna part fixa da lur program â Incantanti do egna survesta da las diferaintas fasas da la lavur cumpositorica da Benedikt Dolf. Surtut la fasa tardiva, igls davos diesch ons, segi stada caracterisada da la voluntad da Benedikt Dolf da far anzatge pigl idiom sutsilvan, quasi egn relasch pedagogic par la «sia» regiun da Schons-Mantogna-Tumleatga, scriva Hassler. A gest quella fasa stat ear a cor a Klucker ad a las sias cantaduras ad aglis seas cantadurs d'Incantanti.

A natiralmeing ca las canzuns da a par la regiun ca steva fetg a cor a Benedikt Dolf ân furmo egna fegn speziala da la sera.